

Segun denuncia:

Indicacion cu Aruba ta birando trampolin pa diferente negoshi ilegal

ORANJESTAD (AAN) -- Tin indicacion serio cu Aruba ta birando trampolin pa diferente sorto di negoshi ilegal. E articulo aki ta refleha un situacion cu sigur mester worde investiga pa autoridadnan local tambe.

Recientemente algun persona di nacionalidad Colombiano cu a bolbe nan pais caba, a tuma contacto cu DIARIO pa haci un denuncia serio. Esaki ta relaciona cu posible traficacion di droga, uniform pa guerrillero, y trata di blanca cu aparentemente ta sosode riba nos isla, via mafia organiza forma pa hende local, algun Colombiano residente, y contactonan na Colombia mes, segun indicacion na Cali.

Segun e informantenan e cabes di e organizacion na Aruba ta un señora local, biba na Tanki Leendert, kende ta manda pone avisonan den corantnan, specialmente na Cali, unda ta worde ofreci trabaoonan na Aruba den e ramenton di limpieza (servicio domestico), construccion, y otronan pa cual no mester di estudionan academico. Asina nan ta ofrece sueldonan di mil dollar mas e costo di e permiso cu ta dos mil dollar. Na Colombia, esnan cu ta kere den tur loke "papel ta bisa" ta bende sea nan motocicleta, nan casita, nan artefactonan electrico, y tur loke nan ta posee despues di añanan di trabao duro, pa bin Aruba cu expectativanan grandi cu despues ta resulta completamente falso.

E aviso pa trabao domestico ta capta atencion di cantidad di hende muher, sea mamanan hoben of damitanan cu no por a caba estudio y nan ta mira un oportunidad pa gana mil florin pa luna y yuda asina nan famia sali dilanti.

Supuestamente ora e contacto ta worde haci entre esun of esnan encarga na Colombia pa haya hende bin Aruba, e hendenan aki ta worde ricibi den gruponan di cinco pa diez pa e dama Arubiano cu ya caba a paga hotel pa nan (den calidad di turista) pa tres dia so.

Despues di tres dia e sernan humano aki ta worde ubica den casitanan na Cero Blanco y Madiki hunto cu hendenan di otro nacionalidadnan, y aki e martirio ta cuminsa ya cu e

personanan aki ta haya trabao temporal cu advertencia pa nan no worde gara pa emigracion tanten cu e papelnan di permiso no bin cla.

E dama y damitanan ta worde tuma den servicio di barnan unda tin indicacion prome nan ta sirbi cliente den bali y despues, poco poco nan ta worde envolvi den prostitucion.

Ya na Aruba sin cent den man y como ilegal, tin ta keda haci e trabao aki pasobra na Colombia nan a bende tur pertenencia di cual nan por a saca cent pa paga e dos mil dollar nan pa e permiso.

Pa loke ta trata casitanan na Cero Blanco unda posiblemente traficacion di droga ta tuma lugar como tambe consumo door di hende di diferente nacionalidad, no ta noticia nobo. For di hopi tempo DIARIO a worde poni na haltura, el a worde comenta na radio tambe, y te hasta tin hende ta yama polis constantemente pa e situacion aki. Straño ta cu te ainda e casitanan tey y cu e

problema a sigui crece. Unda autoridadnan policial a keda, y pakico nan no ta actua?

TRAFICACION DI DROGA?

Aparentemente e mesun hendenan cu ta trece hende ilegal for di Colombia tin contacto cu "capitannan di droga". Supuestamente un tal "Harold" tabata na Aruba, unda a keda den un hotel grandi, relaciona cu traficacion di droga. E fuentenan a menciona cu poco siman pasa un Colombiano cu a worde usa como mula a drenta cu droga den su barica y aki e mester a bebe laxante pa saca e saconan aki den sushi.

NEGOSHI CU UNIFORM?

Supuestamente tin hende conecta cu e mesun organizacion cu ta trece e ilegalnan Aruba cu tin un negoshi di uniform camufla di exercito cu por haya na Merca facilmente y pa prijs barata, anto for di Aruba nan ta worde

transporta pa e guerilla Colombiano, no sin laga su bon ganashi den e saco di esnan cu ta busca e material na Merca y ta mande Colombia bao capa di "regalo" pa famia.

MIEDO PA HACI DENUNCIA

DIARIO a puntra su informantenan si nan a denuncia tur esaki na Consulado di Colombia, y nan contesta ta negativo. Nan tin miedo pasobra nan a keda ilegal na Aruba y nan no sa ki sorto di medida legal nan por haya. En todo caso, DIARIO ta aconseha cualquier otro Colombiano cu por ta pasando den un situacion as-

ina pa haci e denuncia cerca nan sede diplomatico, ya cu ta un deber civico pa pone autoridadnan di nan pais na haltura di kico ta pasando, pa asina busca manera pa detene e desarojo aki.

Discrecion y secrencia ta dos factor fundamental den tur Consulado y sigur esey tambe ta e caso cerca e Consulado di Colombia.

DIARIO por divulga informacion cu hendenan ta trece pa nos, pero no por elimina e problema. Cerca e Consulado nan por hasta bin cu prueba nan contundente, cu esaki sigur lo keda secreto pasobra esey ta e sistema di traha di tur sede diplomatico na mundo.

LOKE TEMPO TA MUSTRA

ORANJESTAD (AAN): Den proximo oranan, extension di un area di presion halto cu centro riba Oceano Atlantico lo sigui domina tempo den e region. Esaki lo limita formacion di nubianan cu por produci awacero, manten-

iendo tempo riba e islanan generalmente seco.

Pronostico di tempo pa awe ta mustra cu cielo lo ta levemente te parcialmente nubla, y tempo lo keda generalmente seco.

OP EIGEN BENEN!!

